

**2021 Rhif**

**Y GYFRAITH GYFANSODDIADOL**

**DATGANOLI, CYMRU**

**Gorchymyn Senedd Cymru (Breinlythyrau a Phroclamsiynau)  
2021**

<i>Gwnaed</i> - - - -	<i>10fed Chwefror 2021</i>
<i>Gosodwyd gerbron Senedd Cymru</i>	<i>11eg Chwefror 2021</i>
<i>Yn dod i rym</i> - -	<i>4ydd Mawrth 2021</i>

Yn y Llys yng Nghastell Windsor, ar y 10fed dydd o Chwefror 2021

Yn bresennol,

Ei Hardderchocaf Fawrhydi'r Frenhines yn y Cyfrin Gyngor

Mae'n bleser gan Ei Mawrhydi, drwy arfer y pwerau a roddir Iddi gan adran 116(3) o Ddeddf Llywodraeth Cymru 2006(a), yn ôl cyngor a chyda chyngor Ei Chyfrin Gyngor, orchymyn fel a ganlyn:

**Enwi, cychwyn a dehongli**

**1.**—(1) Enw'r Gorchymyn hwn yw Gorchymyn Senedd Cymru (Breinlythyrau a Phroclamsiynau) 2021 a daw i rym ar 4ydd Mawrth 2021.

(2) Yn y Gorchymyn hwn—

- (a) ystyr “Deddf 2006” yw Deddf Llywodraeth Cymru 2006;
- (b) ystyr “Breinlythyrau” yw Breinlythyrau a lofnodwyd gan Ei Mawrhydi â'i llaw Ei hunan i ddynodi Ei Chydsyniad i Fil a basiwyd gan Senedd Cymru;
- (c) ystyr “proclamsiynau” yw proclamsiynau brenhinol o dan adrannau 4(2) a 5(4) o Ddeddf 2006.

**Ffurf ar Freinlythyrau a phroclamsiynau**

**2.** Y ffurf ar eiriau sydd i'w defnyddio—

- (a) mewn Breinlythyrau yw'r ffurf honno a nodir yn Rhan 1 o'r Atodlen i'r Gorchymyn hwn,

---

(a) 2006 p. 32. Mae adran 116 fel y'i diwygiwyd gan Atodlen 6 i Ddeddf Cymru 2017 (p. 4) bellach yn cynnwys y pŵer i wneud darpariaeth o ran ffurf, dull llunio, a chyhoeddi pob proclamsiwn brenhinol o dan adrannau 4(2) a 5(4) o Ddeddf Llywodraeth Cymru 2006. Diwygiwyd adran 116 hefyd gan Atodlen 1 i Ddeddf Senedd ac Etholiadau (Cymru) 2020 (dccc 1) i roi effaith i'r newid o ran ailenwi Cynulliad Cenedlaethol Cymru yn Senedd Cymru.

- (b) mewn proclamsiynau o dan adran 4(2) o Ddeddf 2006 yw'r ffurf honno a nodir yn Rhan 2 o'r Atodlen honno, ac
- (c) mewn proclamsiynau o dan adran 5(4) o Ddeddf 2006 yw'r ffurf honno a nodir yn Rhan 3 o'r Atodlen honno,

yn ddarostyngedig yn unig i unrhyw amrywiadau sy'n angenrheidiol o dan yr amgylchiadau.

### **Llunio Breinlythyrau a phroclamsiynau**

3. Caniateir llunio Breinlythyrau a phroclamsiynau mewn print neu mewn ysgrifen, neu'n rhannol mewn print ac yn rhannol mewn ysgrifen, a chaniateir eu llunio naill ai ar bapur neu ar femrwn.

### **Cyhoeddi Breinlythyrau a phroclamsiynau**

4.—(1) Cyn gynted ag y bo'n rhesymol ymarferol wedi i Freinlythyrau o dan y Sêl Gymreig gael eu hysbysu i Glerc y Senedd, rhaid i Geidwad y Sêl Gymreig drefnu ar gyfer cyhoeddi'r Breinlythyrau yn The London Gazette, The Edinburgh Gazette a The Belfast Gazette.

(2) Rhaid i broclamsiynau gael eu cyhoeddi yn The London Gazette, The Edinburgh Gazette a The Belfast Gazette.

### **Dirymu Gorchymyn Cynulliad Cenedlaethol Cymru (Breinlythyrau) 2011**

5. Mae Gorchymyn Cynulliad Cenedlaethol Cymru (Breinlythyrau) 2011(a) wedi ei ddirymu.

*Richard Tilbrook*  
Clerc y Cyfrin Gyngor

---

(a) O.S. 2011/752.

## YR ATODLEN

Erthygl 2

### Ffurf ar ddogfennau

#### RHAN 1

##### **Breinlythyrau**

“ELISABETH YR AIL drwy Ras Duw Brenhines Teyrnas Unedig Prydain Fawr a Gogledd Iwerddon a’n Teyrnasoedd a’n Tiriogaethau eraill Pennaeth y Gymanwlad Amddiffynnydd y Ffydd At Ein Ffyddlon ac anwylaf Aelodau o’r Senedd CYFARCHION:

YN GYMAINT Â BOD un neu ragor o Filiau, y nodir eu henwau byr yn yr Atodlen i hyn, wedi eu pasio gan Senedd Cymru ac wedi eu cyflwyno i Ni ar gyfer Ein Cydsyniad Brenhinol gan Lywydd Senedd Cymru yn unol â Deddf Llywodraeth Cymru 2006, ond na ddaw’r Biliau hynny, yn rhinwedd Deddf Llywodraeth Cymru 2006, yn Ddeddfau Senedd Cymru ac na fydd iddynt effaith Gyfreithiol heb Ein Cydsyniad Brenhinol a ddynodir drwy Freinlythyrau o dan Ein Sêl Gymreig a’n llofnod Ein Hunain, yr Ydym felly wedi peri gwneud y rhain, Ein Breinlythyrau ac wedi eu llofnodi, a thrwyddyt rhoddwn Ein Cydsyniad Brenhinol i’r Biliau hynny sydd i’w cymryd a’u derbyn fel Ddeddfau da a pherffaith y Senedd a’u rhoi ar waith yn briodol yn unol â hynny GAN ORCHYMYN HEFYD Geidwad Ein Sêl Gymreig i selio’r rhain, Ein Llythyrau â’r Sêl honno.

YN DYSTIOLAETH O HYNNY yr Ydym wedi peri gwneud y rhain, Ein Llythyrau yn Agored

TYSTIED Ein Hunain yn . . . ar . . . o’n Teyrnasiad

Llofnodwyd gan y Frenhines Ei Hunan â’i Llaw Ei Hunan.”

#### RHAN 2

##### Proclamsiynau o dan adran 4(2) o Ddeddf 2006

“PROCLAMASIWN GAN Y FRENHINES

SY’N DIDDYMU SENEDD CYMRU AC SY’N PENNU DYDDIAD Y BLEIDLAIS YN YR ETHOLIAD CYFFREDINOL ARFEROL WEDI HYNNY.

Gan fod Gennym, o dan adran 4(2) o Ddeddf Llywodraeth Cymru 2006, os yw Llywydd Senedd Cymru yn cynnig diwrnod i Ni ar gyfer cynnal y bleidlais mewn etholiad cyffredinol arferol i fod yn Aelod o’r Senedd nad yw’n fwy nag un mis cyn, nac yn fwy nag un mis ar ôl, y dydd Iau cyntaf ym mis Mai yn y bumed flwyddyn galendr yn dilyn y flwyddyn honno y cynhaliwyd yr etholiad cyffredinol arferol blaenorol ynddi, bŵer drwy broclamsiwn o dan Ein Sêl Gymreig i ddiddymu Senedd Cymru ac i’w gwneud yn ofynnol i’r bleidlais yn yr etholiad cyffredinol arferol i fod yn Aelod o’r Senedd gael ei chynnal ar y diwrnod a gynigir:

A Chan fod y dywededig Lywydd, yn unol â’r ddywededig adran 4(2), wedi cynnig [*mewnoder y diwrnod a gynigir gan y Lywydd*] fel diwrnod ar gyfer cynnal y bleidlais:

Yr Ydym, felly, yn unol â’r ddywededig adran 4(2) a phob pŵer arall sy’n Ein galluogi yn y cyswllt hwnnw yn datgan, yn cyfarwyddo ac yn ordeinio drwy hyn fel a ganlyn—

1. Mae Senedd Cymru drwy hyn wedi ei diddymu.

2. Cynhelir y bleidlais yn yr etholiad cyffredinol arferol i fod yn Aelod o'r Senedd ar [*mewnosoder y diwrnod a gynigir gan y Llywydd*].

3. Gorchmynnir i Geidwad Ein Sêl Gymreig selio'r proclamsiwn hwn â'n Sêl Gymreig.

Rhodddwyd yn Ein Llys ... ar ... ym mlwyddyn ein Harglwydd ... ac ... o'n Teyrnasiad.”

## RHAN 3

### Proclamsiynau o dan adran 5(4) o Ddeddf 2006

#### “PROCLAMASIWN GAN Y FRENHINES

SY’N DIDDYMU SENEDD CYMRU, SY’N EI GWNEUD YN OFYNNOL CYNNAL ETHOLIAD CYFFREDINOL EITHRIADOL, SY’N PENNU DYDDIAD Y BLEIDLAIS YN YR ETHOLIAD HWWNW AC SY’N EI GWNEUD YN OFYNNOL I’R SENEDD YMGYNNULL O FEWN SAITH NIWRNOD AR ÔL Y BLEIDLAIS HONNO.

Gan fod Gennym, o dan adran 5(4) o Ddeddf Llywodraeth Cymru 2006, os yw Llywydd Senedd Cymru yn cynnig diwrnod i Ni ar gyfer cynnal pleidlais o dan yr amgylchiadau a nodir yn adran 5(2) a (3) o'r Ddeddf honno, bŵer drwy broclamsiwn o dan Ein Sêl Gymreig i ddiddymu Senedd Cymru, i'w gwneud yn ofynnol i etholiad cyffredinol eithriadol i fod yn Aelod o'r Senedd gael ei gynnal, i'w gwneud yn ofynnol i'r bleidlais yn yr etholiad gael ei chynnal ar y diwrnod a gynigir, ac i'w gwneud yn ofynnol i'r Senedd ymgynnull o fewn y cyfnod o saith niwrnod sy'n dechrau yn union ar ôl diwrnod y bleidlais:

A Chan fod y dywededig Lywydd, yn unol ag adran 5(1) o'r Ddeddf honno, wedi cynnig [*mewnosoder y diwrnod a gynigir gan y Llywydd*] fel diwrnod ar gyfer cynnal y bleidlais:

Yr Ydym, felly, yn unol â'r ddywededig adran 5(4) a phob pŵer arall sy'n Ein galluogi yn y cyswllt hwnnw yn datgan, yn cyfarwyddo ac yn ordeinio drwy hyn fel a ganlyn—

1. Mae Senedd Cymru drwy hyn wedi ei diddymu.

2. Cynhelir etholiad cyffredinol eithriadol i fod yn Aelod o'r Senedd.

3. Cynhelir y bleidlais yn yr etholiad hwnnw ar [*mewnosoder y diwrnod a gynigir gan y Llywydd*].

4. Rhaid i'r Senedd ymgynnull o fewn y cyfnod o saith niwrnod sy'n dechrau yn union ar ôl y dyddiad hwnnw.

5. Gorchmynnir i Geidwad Ein Sêl Gymreig selio'r proclamsiwn hwn â'n Sêl Gymreig.

Rhodddwyd yn Ein Llys ... ar ... ym mlwyddyn ein Harglwydd ... ac ... o'n Teyrnasiad.”

## **NODYN ESBONIADOL**

*(Nid yw'r nodyn hwn yn rhan o'r Gorchymyn)*

Mae adran 107(2) o Ddeddf Llywodraeth Cymru 2006 (p. 32) ("Deddf 2006") yn darparu bod Bil a gaiff ei basio gan Senedd Cymru yn dod yn Ddeddf pan gaiff y Cydsyniad Brenhinol.

Mae adran 115(4) o Ddeddf 2006 yn darparu bod Bil o'r fath yn cael y Cydsyniad Brenhinol pan hysbysir Clerc y Senedd fod Breinlythyrau o dan y Sêl Gymreig wedi eu llofnodi gan Ei Mawrhydi â'i llaw Ei hunan i ddynodi Ei Chydsyniad.

Mae adrannau 4(2) a 5(4) o Ddeddf 2006 hefyd yn rhoi pŵer i'w Mawrhydi i wneud proclamsiwn o dan y Sêl Gymreig mewn amgylchiadau pan fo'r Llywydd wedi arfer y pŵer yn adran 4(1) neu 5(1) o Ddeddf 2006.

Mae'r Gorchymyn hwn yn rhagnodi'r ffurf ar eiriau i'w defnyddio mewn Breinlythyrau sy'n dynodi'r Cydsyniad Brenhinol i Filiau a gaiff eu pasio gan Senedd Cymru ac mewn proclamsiynau brenhinol a wneir o dan adrannau 4(2) a 5(4) o Ddeddf 2006. Mae hefyd yn gwneud darpariaeth o ran llunio a chyhoeddi'r dogfennau hynny.

Mae'r Gorchymyn hwn yn dirymu'r Gorchymyn blaenorol a wnaed yn 2011.